

金史紀事本末





20794663

20794663-1-20794663-1-20794663

金史紀事本末

〔清〕李有棠撰

M74/14

D225-75

中

華書局

第三卷
三七至卷五二
册

794663



金史紀事本末

(全 三 冊)

李有棠著 崔文印整理

*

中 華 書 局 出 版

(北京王府井大街36號)

新華書店北京發行所發行

北京第二新華印刷廠印刷

*

850×1168毫米 1/32·30¹/₂·印張·500千字

1980年8月第1版 1980年8月北京第1次印刷

印數 1—5,700 冊

統一書號：11018·841 定價：3.40 元

•

金史紀事本末卷三十七

布薩揆侵宋更盟

章宗明昌元年（庚戌二一九〇）春正月丙辰朔，宋試戶部尚書郭德麟、宜州觀察使蔡錫賀正旦。〔攷異〕章宗紀繫之去年十二月，以世宗喪，正旦不受賀，且未列使名。今從交聘表，以下同。

秋七月己巳，遣禮部尚書王脩等賀宋生日。

八月己酉，宋使賀天壽節。正使爲顯謨閣學士（邱）〔丘〕宿（據金史卷六二交聘表改），副使福州觀察使蔭必勝。

冬十一月乙卯，遣簽書樞密事巴達爾呼等賀宋正旦。

二年（辛亥二一九一）春正月庚戌朔，宋試吏部尚書蘇山、潭州觀察使劉詢賀正旦。辛酉，孝懿太后崩。丙寅，遣左副都點檢面等報哀於宋。

三月丁丑，宋使來弔祭。正使爲試禮部尚書宋之瑞，副使嚴州觀察使宋嗣祖，太常少卿王叔簡讀祭文。

秋七月己巳，遣同簽大陸親府事究等賀宋生日。

八月乙巳，宋使賀天壽節。正使爲試戶部尚書趙癰，副使婺州觀察使田臬。

冬十一月丁巳，遣幽王傅宗璧等賀宋正旦。

三年（壬子二一九二）春正月乙巳朔，宋煥章閣學士黃申、明州觀察使張宗益賀正旦。〔攷

異〕章宗紀繫之去年十二月，以太后喪，正旦不受賀，且未列使名，下同。

秋七月辛卯，遣都點檢布薩端等賀宋生日。

八月丁卯，宋使賀天壽節。正使爲工部尚書錢之望，副使廣州觀察使楊大節。

冬十一月戊寅，遣右副都點檢溫都忠等賀宋正旦。

四年（癸丑二一九三）春正月己巳朔，宋顯謨閣學士鄭汝諧、均州觀察使譙令〔雍〕（據金史卷

六二交聘表補）賀正旦。

秋七月己丑，遣御史中丞董師中等賀宋生日。

九月甲子朔，宋使賀天壽節。〔攷異〕交聘表繫之八月辛酉，正使爲吏部尚書許及之，副使明州觀察使

蔣介。

冬十一月戊寅，遣翰林直學士完顏匡等賀宋正旦。命匡權易名弼，以避宋諱故也。

五年（甲寅二一九四）春正月癸亥朔，宋使賀正旦。正使爲翰林學士倪思，副使知開門事王知新。

夏六月戊戌，宋孝宗崩。

秋七月甲子，光宗遜位，甯宗立。

九月戊午朔，宋使賀天壽節。〔攷異〕交聘表繫之八月乙卯，正使爲試工部尚書梁總，副使明州觀察使戴

勳。壬申，宋使來告哀。正使爲顯謨閣學士薛叔似，副使廣州觀察使謝淵。戊寅，遣知大興府事尼瑪哈

鑑等使宋弔祭。

冬十月庚寅，宋使獻遺留物。正使爲戶部尚書林湜，副使泉州觀察使游恭。

閏月戊午朔，宋使告卽位。正使爲翰林學士鄭湜，副使廣州觀察使范仲任。甲戌，遣河東南、北提

刑使王啟往賀。副使爲廣威將軍舒穆魯仲溫。

十一月庚子，遣右宣徽使伊喇敏賀宋正旦。副使爲山東東路轉運使高世忠。

六年（乙卯一一九五）春正月丁亥朔，宋使賀正旦。使者爲試禮部尚書曾三復。

二月癸未，宋使來報謝。正使爲煥章閣學士林季友，副使明州觀察使郭正己。

秋八月辛未，遣吏部尚書吳鼎樞等賀宋生日。

九月壬午朔，宋使賀天壽節。〔攷異〕交聘表繫之八月己卯，正使爲試吏部尚書汪義端，副使福州觀察使

韓侂胄。

冬十一月丙申，遣刑部尚書赫舍哩貞賀宋正旦。

承安元年（丙辰一一九六）春正月辛巳朔，宋使賀正旦。正使爲翰林學士黃艾，副使均州觀察使柳

正一。

秋九月丁丑朔，宋使賀天壽節。〔攷異〕交聘表繫之八月甲戌，正使爲試工部尚書吳宗旦，副使湖州觀察使張卓。癸未，遣吏部尚書張嗣等賀宋生日。

冬十一月甲午，遣陝西統軍使崇道等賀宋正旦。

二年（丁巳一二九七）春正月乙亥朔，宋使賀正旦。正使爲煥章閣學士張貴謨，副使嚴州觀察使郭倪。辛丑，宋遣使告母后哀。正使爲試禮部尚書趙介，副使利州觀察使朱龜年。（按，此與三年正月乙丑重復。據宋史卷三七寧宗紀宋母后崩於慶元三年，却承安二年十一月，此處誤。）〔攷異〕章宗紀及交聘表均未書遣使弔祭。

秋九月辛丑朔，宋使賀天壽節。〔攷異〕交聘表繫之八月戊戌，正使爲試工部尚書衛涇，副使泉州觀察使陳奕。丁未，遣知歸德府事完顏愈等賀宋生日。

三年（戊午一二九八）春正月己亥朔，越辛丑，宋使來賀正旦。正使爲煥章閣學士曾炎，副使鄂州觀察使鄭挺。乙丑，宋遣使告祖母后哀。正使爲試禮部尚書趙介，副使利州觀察使朱龜年。

二月辛巳，遣都指揮使烏凌阿天益等使宋弔祭。〔攷異〕交聘表未書，今從紀。

秋八月癸未，宋遣使報謝。正使爲試刑部尚書湯碩，副使福州觀察使李汝翼。

九月丙申朔，宋使賀天壽節。正使爲顯謨閣學士楊王休，副使利州觀察使李安禮。遣中都都轉運使孫鐸等賀宋生日。

冬十一月丁未，遣太常卿楊庭筠等賀宋正旦。

四年（己未二一九九）春正月癸巳朔，宋使賀正旦。正使爲工部尚書馬覺，副使廣州觀察使鄭鑑。

秋九月庚寅朔，宋使賀天壽節。〔攷異〕交聘表繫之八月己丑，正使爲試工部尚書李大性，副使泉州觀察

使金湯楫。己未，遣知東平府事布薩琦等賀宋生日。

冬十一月甲寅，遣知濟南府事范楫等賀宋正旦。

五年（庚申二二〇〇）春正月戊子朔，宋使賀正旦。正使爲煥章閣學士朱致知，副使福州觀察使李

師舉。

秋九月甲寅朔，宋使賀天壽節。〔攷異〕交聘表繫之八月壬子，正使爲戶部尚書趙善義，副使鄂州觀察使

屬仲祥。

冬十月庚子，宋使告母后哀。〔攷異〕交聘表，正使爲試刑部尚書吳玘，副使利州觀察使林可大。十一月

乙卯，遣工部尚書烏庫哩誼使宋弔祭。章宗紀均未書。

十一月己巳，宋復遣使告哀。按，光宗以八月辛卯崩，至是始告哀。正使爲煥章閣學士李寅仲，副使福

州觀察使張良顯。辛未，遣右副點檢赫舍哩忠定賀宋正旦。

十二月癸未朔，遣河南統軍使充等使宋弔祭。

泰和元年（辛酉二二〇一）春正月壬子朔，宋使賀正旦。正使爲寶謨閣學士林楠，副使利州觀察使王

康成。壬戌，宋使獻先帝遺留物。正使爲試工部尚書丁常任，副使嚴州觀察使郭倭。

三月乙亥，宋使報謝。正使爲試刑部尚書虞儔，副使泉州觀察使張仲舒。

秋八月丙申，宋復遣使謝。正使爲試戶部尚書俞烈，副使福州觀察使李言。

九月戊申朔，宋使賀天壽節。〔攷異〕交聘表繫之八月丙申，正使爲試吏部尚書陳宗召，副使廣州觀察使

竇變。遣右宣徽使圖克坦懷忠等賀宋生日。

冬十一月庚申，遣右衛將軍赫舍哩齊勤等賀宋正旦。

二年（壬戌一二〇二）春正月丁未朔，宋使賀正旦。正使爲煥章閣學士李景和，副使福州觀察使陳

有功。

秋九月壬寅朔，宋使賀天壽節。〔攷異〕交聘表繫之八月庚子，正使爲試工部尚書趙不覲，副使鄂州觀察

使黃卓然。甲寅，遣都指揮使完顏瑋等賀宋生日。〔攷異〕交聘表繫之八月丙辰，（按，是年八月壬申朔，月

內無丙辰。〔八月〕當是〔九月〕之誤。副使張行簡。

冬十二月癸酉，遣武安節度使圖克坦公弼等賀宋正旦。

三年（癸亥一二〇三）春正月辛未朔，宋使賀正旦。正使爲試吏部尚書魯謙，副使利州觀察使王處久。

秋九月丙寅朔，宋使賀天壽節。〔攷異〕交聘表只書甲子日，未繫月，疑有脫誤（按，是年九月丙寅朔，〔甲

子〕是其前二日，則〔甲子〕前脫〔八月〕二字。正使爲試禮部尚書劉甲，副使泉州觀察使郭倬。壬申，遣刑部尚書

承暉等賀宋生日。

冬十一月辛未，遣簽樞密院事通吉思忠等賀宋正旦。時奉御完顏阿魯俗使宋還，言宋權臣韓侂胄市馬厲兵，將謀北侵。帝怒其生事，答五十，貶官。及淮平陷，擢安國節度副使。見章宗紀。

四年（甲子二〇四）春正月乙丑朔，宋使賀正旦。正使爲試吏部尚書張孝曾，副使容州觀察使林伯成。丁丑，孝曾回，至慶都縣卒。遣防禦使鈕祐祿〔元〕〔據金史卷六二〕交聘表補充敕祭使，賻贈絹布各二百二十疋，館伴張雲護喪歸。〔攷異〕章宗紀鈕祐祿作努色爾，原作女奚列。

秋八月乙卯，遣知真定府事完顏昌等賀宋生日。

九月庚申朔，宋使賀天壽節。〔攷異〕交聘表繫之八月癸丑，正使爲試禮部尚書張嗣古，副使廣州觀察使陳煥〔煥〕〔同上改〕。

冬十一月丁卯，遣右副都檢點烏凌阿毅等賀宋正旦。〔攷異〕交聘表，癸未，寶雞縣諸社被宋抄掠。紀未載。

五年（乙丑二〇五）春正月己未朔，宋使賀正旦。〔攷異〕交聘表，正使爲試吏部尚書鄧友龍，〔副使〕（據例補）利州觀察使皇甫斌。庚申，宋兵入遂平縣縱掠，出獄囚，火官舍，害令尉而去。二月己酉，掠泌陽，剽巡檢家費，害其家人。紀未載。薛應旂通鑑云，甯宗嘉泰三年冬，鄧友龍使金，有路驛使求見者，具言金爲韃靼所困，饑饉連年，民不聊生。王師若來，勢若拉朽。友龍歸告。韓侂胄上倡兵之書，北伐議遂起。時金國多難，懼朝廷乘其隙，沿邊聚糧，且禁襄陽樵場。邊釁之開自此始。續綱目云，三年七月，造戰艦。八月增置襄陽騎軍，尋又置敵、浦水軍。四

年正月，定議伐金。金爲北部準布等部所擾，無歲不與師討伐，兵連禍結，國勢日弱。有勸侂冑立蓋世功名以自固者，遂聚財募卒，出封樁庫黃金萬兩，以待賞功。命吳曦練兵西蜀。安豐守臣厲仲方言，淮北流民咸願歸附，浙江安撫使辛棄疾入見，言金國必亡，願屬元老備兵爲緩急計。鄭挺、鄧友龍附和其說，用師之意益銳。通鑑輯覽謂金自明昌末，北部哈達錦、桑節袞恃強擾邊，光嘉喇尤桀驁，屢脅諸部入寇。卓木布亦叛，師老財匱。按哈達錦舊作合底忻，桑節袞舊作山只昆，光嘉喇舊作廣吉刺，卓木布舊作阻驤，卽準布。所載稍異。周密齊東野語云，長沙鄧友龍嘗從南軒游，自詭道學，後爲謝丞相被累，出爲淮西漕，日夕謀復入。時金方困北兵，歲荐饑，於是沿邊不遑號「跳河子」者，時時剽獵事狀，陳說利害，友龍得之，爲奇貨，獻於韓，兵端實友龍發之也。李心傳朝野雜記云，侂冑死，從事郎毛自知降充殿試第五甲，仍奪第一人恩例，以首論用兵也。潛說友咸淳臨安志云，封樁庫在三省大門內，肇於孝皇之世。玉音對輔臣謂，創此備緩急者是也。嘉定七年，又分戶部所掌錢物隸本所，於是有上下之別，下庫在左藏庫中門內，又安邊太平庫在封樁下庫南。左藏庫在清湖橋西，以韓世忠所獻賜第爲之。

三月乙丑，宋兵入秦川界。辛巳，入鞏州來遠鎮。唐州得宋諜言，韓侂冑屯兵鄂、岳，將謀北侵。〔攷異〕〔交聘表〕三月戊午朔，宋兵焚平氏鎮，掠民財。〔紀未載〕

夏四月癸巳，命樞密院移文宋人，依誓約撤新兵，毋縱入境。〔攷異〕〔交聘表〕（四）〔三〕〔據金史卷六二〕〔交聘表改〕月庚午，宋兵掠鄧州白亭巡檢家資，持其印去。〔紀未載〕宋史及通鑑均不書，惟見完顏匡傳。又，鞏州來遠鎮及唐州得宋牒，均繫之是月，與〔紀異〕。

五月甲子，以平章布薩揆爲河南宣撫使，籍諸道兵備宋。甲申，宋人人漣水縣。〔攷異〕大金國志云，宋鎮江都統戚拱，結弓手李成焚漣水。完顏匡傳，宋人人確山界奪民馬。宋史李成作李全。〔交聘表〕甲

申，楚州安撫使戚拱遣其將高顯以兵五百人破漣水。〔紀未載姓名。〕

六月戊子，復漣水縣。甲寅，召諸大臣問備宋之策，皆以設備養惡爲言。帝以南北和

好四十餘載，民不知兵，不忍先發。〔攷異〕完顏匡傳，時趙之傑、承暉、孟鑄等皆謂宋不敢敗盟。獨匡曰：「彼

置忠義保捷軍，取先世開寶、天禧紀元，豈忘中國者哉？參政思忠，大理卿烏延議與合。又云，侂冑嘗再爲國使，覘知虛

實，及爲相，遂與蘇師旦倡議復仇。畢沅續通鑑云，據兩朝綱目備要言，金北邊聚糧，且禁襄陽樵場，與宋史同。然金主

憚於用兵，見本紀。又完顏匡傳，此宋人託爲兵端，曲在金耳，今不取。

秋八月辛卯，詔罷宣撫司。時宋殿帥郭倪，濠州守將田俊邁誘虹縣民蘇貴等爲間。河
南將臣所遣諜多受宋賂，皆言宋增戍本虞他盜。及聞行臺建，亦畏讐不敢去備，且兵皆白
丁，饑疫死者什二三，由是中外信之。宣撫司以宋三省、樞密院及盱眙軍諜來上，又皆鏑點
邊臣爲辭。揆固請罷司，從之。〔攷異〕交聘表繫之五月稍殊。復奏罷臨洮等路新置弓箭手。

九月甲申朔，宋使賀天壽節。〔攷異〕交聘表繫之閏八月辛巳，正使爲試吏部尚書李璧，副使廣州觀察使

林仲虎。戊子，遣河南統軍使赫舍哩子仁等賀宋生日。〔紀載〕是日西北方黑雲間有赤氣如火色，次及西

南、正南、東南皆赤，有白氣貫其中，至中夜赤氣滿天，四更乃散。戊戌，宋兵三百攻比陽寺莊，〔地理志〕云，比陽縣

名，屬唐州淮安郡。副巡檢阿里哈肆嘉努原作阿里根寺家奴。〔攷異〕汪輝祖金史同名錄云，卷十五宣宗興定二

年密州同知節度，姓夾谷氏；卷九十八完顏匡傳世宗時侍正，三人同名寺家奴。死之。甲辰，宋人焚黃澗，擄

巡檢高顯。

冬十月丁丑，宋人襲比陽，唐州軍事判官索多原作撒覲死之。

十一月乙酉，宋人人內鄉，縣名，屬鄧州。攻洛南縣名，屬商州。之固縣，商州司獄壽祖追至

丹河，〔攷異〕漢書地理志云，丹水出上雒冢嶺山，至浙入鈞。史記正義云，故丹城去丹水二百步。酈道元水經注云，

出上洛縣西北冢嶺山，過縣南，又自倉野東，歷苑和山東南，過商縣，南歷少習，出武關，東南流入白口，南合汧水曰浙口。

按，丹水計經商州境三百二十里，經山陽徑十四里，又經商南境二百二十里，共五百五十四里出境。源自冢嶺山之息那

澗黑龍峪，水自藍田界入焉，又會洪門河、蒲盆溝水、水道河、大荆川、西荆川、泉水、大小黃川、紫峪河、盆口河、荆川、大

小桃盆河十九河。諸水餘不具載。見劉於義陝西通志。擊敗之。己丑，遣太常卿趙之傑等賀宋正旦。

〔攷異〕薛應旂通鑑云，時之傑人見，佞冒故使贊者犯金主父嫌名以挑之。之傑遂倨慢，佞冒請帝還內。著作郎朱質請斬

金使，不報。詔使人更以正旦朝見，尋因北使倨慢，奪館伴使副官。是冬，以邱富爲江淮宣撫使，辭不拜。手書諫北伐，

不從。密字宗卿，江陰軍人，官樞府，諡忠定。命辛棄疾安撫兩浙，進樞密承旨，辛棄疾〔長沙〕〔歷城〕〔據宋史卷四〇一

辛棄疾傳改〕人，豪爽尚氣節，喜功名，時亦爲佞冒所用。元好問中州集，之傑字伯英，大定人。本名宗傑，避諱改。大

定十六年進士，仕終太常卿。使宋還，言事云：「宋人文敵之極，且脆弱，不足憂，邊部爲可慮也。」其前識如此。子繪，名

進士，早卒。孫季卿，今在燕中。史未載。顧奎光金詩選載之傑題洛源龍潭寺詩一首。

十二月，宋吳曦擁衆與元，欲窺關隴，皇甫斌擾淮北。

六年〔丙寅〕二〇〇春正月癸未朔，宋使賀正旦。正使爲試刑部尚書陳景俊，副使知開門事吳瑄。

丁亥，宋使陳克俊朝辭，諭曰：「大定初，世宗皇帝許宋世爲姪國，朕遵守遺法，和好至今。豈意爾國屢有盜賊犯我邊境，故遣大臣宣諭河南。及得爾國公移，已點黜。」〔黜〕據金史卷一二章宗紀改邊臣，抽去戍卒，朕不介意小嫌，遂罷宣撫。比來羣臣屢以爾國渝盟爲言，朕惟和好歲久，委曲涵容。恐姪宋皇帝或未詳知。若依前不息，朕雖兼愛生靈，事難終已。卿等歸國，當具言之。」〔攷異〕續綱目云，景俊還，以告陳自強，自強戒勿言，由是用兵益決。

三月己酉，宋人攻靈璧，南京按察使行部至縣，匿民舍得免。

夏四月丙辰，宋人圍壽春，防禦使賢聖努擊卻之。統軍使赫舍哩子仁遣嚴整等覘敵，還言皇甫斌聚兵規取唐鄧，以降人田元、張貞、張勝爲鄉導，乃請以南京副留守赫舍哩毅及副統軍圖克坦鐸分統諸軍，而自以兵駐汴防守，從之。〔攷異〕大金國志云，是時，汴京留守爲完顏童奏報始知。紀未載。丙寅，詔平章布薩揆領行省於汴，便宜從事。以赫舍哩執中爲都統，完顏薩喇原作撒刺。〔攷異〕汪輝祖金史同名錄云，卷十一章宗紀承安五年大理卿，卷四十五刑志泰和五年翰林修撰，三人同名撒刺。爲副統，盡徵諸道兵。復以完顏充爲陝西五路都統。語詳規取隴蜀事中。丁丑，宋人入新息，縣名，屬息州。內鄉及泗州、虹縣、潁上。〔續通考〕云，息州，唐後改新息，金升爲州，以新息屬倚郭，割真陽、褒信、新蔡隸焉。泗州，唐改臨淮郡，後仍舊，金置樞場，領淮平、臨淮、淮濱四縣。〔攷異〕宋史肅宗紀云，時鎮江都統制陳孝慶復泗州，江州都統制許進復新息，光州忠義人孫成復褒信，陳孝慶復虹縣。大金國志陳孝慶作

陳孝廣。通鑑輯覽云，郭倪遣兵復泗州，時畢再遇爲先鋒，功第一。再遇冠期進，聞金已有備，乃先一日出其不意。舊有二城，乃僞爲攻西城狀，逕趣東城。先登，克之。殺金兵數百，西城亦降。所載互異。續綱目云，倪青聞捷，乃降詔伐金。晷曰：「天道好還，中國有必伸之理，人心効順，匹夫無不報之仇。軍人塞而猶肆創殘，使來庭而敢爲桀驁。洎行李之繼道，復慢詞之見加，含垢納污，在人情而已極，聲罪致討，值胡運之將傾。兵出有名，師直爲壯。言乎遠，言乎近，孰無忠義之心？爲人子、爲人臣，當念祖宗之憤。」直學士院李壁詞也。壁字季章，眉州丹棱人，廕子。李心傳朝野雜記云，倪青舉兵，先以葉正則適值學士院，使草出師詔，再三辭，又欲命魯鴻父漸，亦辭，乃命壁爲之。所載甚詳。

五月壬午，宋李爽圍壽州，田俊邁入蘄縣，屬宿州。秦詵攻蔡州，防禦使完顏佛珠原作佛住

敗之。入金城海口，殺長山尉，執二巡檢去。〔攷異〕薛應旂通鑑云，時建康都統李爽攻壽州，兵敗。江州

都統王大節攻蔡州，亦不克而潰。

宋史甯宗紀云，大節兵潰除名，袁州安置，尋徙封州。史未載大節事。

丙戌，以出

師告於天地太廟。戊子，命平章揆兼左副元帥，完顏匡爲右副元帥，陝西都統充爲右監軍，

烏庫哩毅爲左都監。癸巳，宋田俊邁率步騎二萬攻宿州，安國軍名，卽邢州。節度副使納喇邦

烈與同知防禦使穆延薩克達逆擊，敗之。邦烈中流矢。宋郭倬、李汝翼以衆五萬繼至，遂

圍宿州。會霖雨，邦烈遣騎潛出敵後，擊敗之。薩克達率騎蹂之，殺傷數千人。敵復聞援

軍將至，遂夜遁，黎明踵擊，追至蘄，州名。〔攷異〕輿地廣記云，春秋屬楚，秦屬九江郡，二漢屬江夏郡，吳置

蘄春郡，北齊置雍州，後周曰蘄州。

今縣五：蘄春、蘄水、羅田、廣濟、黃梅。

續通考云，唐後改蘄春郡，後仍舊。宋爲防

禦州，明隸黃州府，領廣濟、黃梅二縣。執田俊邁。〔攷異〕宋史甯宗紀云，郭倪遣郭倬等攻宿州，敗，還至蘄，金人追

而圍之。倬執統制田俊邁以與金人，乃得免。續綱目及薛應旂通鑑倬外尚有李汝翼。岳珂程史云，王師始渡淮，李汝翼以騎帥，郭倬以池，田俊邁以濠，分三軍並趨符離，圍之。虜守欲迎降，忠義已肉薄而登，我軍反嫉其功，自下射之。頗守陴者曰：「是一家人，猶爾我輩，安得脫？」復爲備，餉爲斂焚，三將無覺者。居數日，而士不爨矣。初取泗，居一月，之宿州。汝翼至，營於積水卑窪處，爲水淹，軍饑，遂先潰。二將亦掃營去，改塗自蘄入城，而敵已至，我軍幾殲。大酋僕撒李革使謂汝翼，「執俊邁歸我，可全師。」不敢應。提轄余永甯告倬，遂執之與敵。敵啟門，出二將，猶勦其後騎。倬爲招撫倪弟，庇弗究。事聞，命大理正喬夢符置獄京口，杖永甯脊，黥流海島。倬弟僕妄訴於平原，喬復至，獄具，永甯磔死，倬棄市，從者置極典。汝翼竄瓊州，籍其家。俊邁家賜宅予官。倪尋以怯懦謫南康。嘉定中，與僕俱流嶺南，没人資產。倬之罪不及汝翼，其帥九江，刻剝無藝，日課軍士，貧者履一雙，人呼「李草鞋」。既敗，猶取馬司五萬緡歸其家。倪、倬、僕皆浩孫，世將家，寵利盈溢，隕其家聲。甲辰，宋皇甫斌攻唐州，刺史烏克遜鄂屯一作兀屯，官左監軍，有傳。〔攷異〕卷「八十」一（據金史卷八「夾谷吾里補傳補」）夾谷吾里補傳其父名兀屯，另一人。拒之，行省遣泌陽縣名，屬唐州。副巡檢納哈塔軍勝來援，遂敗之。〔攷異〕「烏克遜溫屯」傳，原作烏古孫兀屯，上京路人。時皇甫斌步騎萬人攻唐州，遣泌陽尉博碩布、巡檢布希拒守，另遣判官薩克達襲宋營，敗之，殺數千百人，宋兵亂，遁去。及斌復來攻，與軍勝合擊，伏兵發，宋兵爲二，遂大潰。至湖陽，斬首萬級，又敗其別將於竹林寺，手殺之。所載較詳。

六月辛亥朔，宋李爽圍壽州，刺史圖克坦義拒守，踰月不能下。河南統軍判官奇珠原作乞住及邁珠原作買哥等來援，合擊敗之。同知軍州事布埒庫原作蒲烈古中流矢死。部曲魏全亦不屈死。〔攷異〕「大金國志」云，時宋李爽侵壽州，敗績。田林取壽春府。宋史「肅宗」紀田林作田琳，稍異。庚申，右翼

都統完顏薩布原作賽不，後官右丞相，行省徐州，死節。〔攷異〕汪輝祖金史同名錄云，卷一百六高琪傳琪奴，卷一百二十二梁持勝傳咸平治中，三人同名賽不。敗宋曹統制兵於溱水。方輿紀要云，在新鄭縣北，源出密縣境。一

名溱水，東北流至縣界，與洧水合。洧水源出登封縣陽城山。〔攷異〕薩布傳，宋皇甫斌遣率步騎數萬。按，遣字下疑有

脫簡。考章宗紀，泰和六年六月，薩布敗曹統制於溱水，史佚其名，應卽斌所遣也。薛應旂通鑑，宋史南宗紀皆未載此

事，無可質證，姑仍其舊。見元會汾金史攷證。續綱目云，侂冑以師出無功，免鄧友龍官，以邱密爲兩淮宣撫，駐揚州。

宿至鎮，部署諸將，悉以三衙江上軍分守江淮要害。於是王大節、李汝翼、皇甫斌、李爽等皆坐貶。斬郭倬於鎮江。薩師旦以罪竄韶州，籍其家。所載甚詳。丁巳，詔彰德府，宋韓侂冑祖琦墳毋得損壞，仍禁樵採。有宋

宗族所居，各具以聞。長官常加提控。

秋七月癸未，宋商榮復攻東海縣，令完顏綱森原作卞僧擊敗之。還，中伏矢死。甲午，宋

統制戚春以舟師攻邳州，刺史完顏從正敗之。春赴水死，斬其副夏統制。〔攷異〕〔愛實〕〔宗室〕

傳〔據金史卷六六宗室傳改〕，原作阿喜，宗室子。歷同知歸德節度。宋統制劉文〔儉〕〔謙〕〔據金史卷六六阿喜傳改〕攻

宿遷，愛實迎擊，破之。復破戚春，夏興國舟兵萬餘人，斬興國於陣。遷鎮國上將軍。復渡淮，破寶應、天長二縣。據此，

則夏統制名興國，可補本紀之闕。

九月戊戌，命尚書左丞布薩端行省於汴。

冬十月〔攷異〕宋史作八月。戊申朔，平章揆分九道侵宋。以行省兵三萬出潁、壽，統軍使

子仁兵三萬出渦口，副元帥匡兵二萬五千出唐、鄧，左監軍執中兵二萬出清口，右監軍充兵